

重修兩淮鹽法志

兩淮鹽法志卷八十四

督銷門

借運北鹽

鹽爲海濱自然之利而產收豐歉則視乎天時陰雨風潮皆足致患淮南容有缺乏之候往往借運於淮北以彼所餘濟此不足變通盡利所謂權也舊志可稽者惟乾隆年間載有數案自道光咸豐以迄同治亦或一倣行焉舉凡籌款定價雇船配運委曲繁重頗費經營蕭規曹隨編此以資考證志借運北鹽

乾隆十六年閏五月鹽政吉慶批准運使郭一裕詳淮南

各場因雨水產鹽稀少捆運維艱淮北之臨興場產鹽頗旺請酌借庫項給淮南程可正等五商前往收買以濟南運俟冬令鹽花歸土停止照數解繳歸款

乾隆三十三年七月鹽政尤拔世奏准淮南通泰二運判所屬二十二場自五六月以來雨澤稍稀場河淺涸鹽船不能出場抵壩確核江廣岸鹽原可銷至八九月內更有儀所陸續開運之船民食自不虞缺乏但目下垣鹽不能相繼出場而天氣久晴河流不暢不可不預爲酌籌以期有備無患查乾隆十六年淮北臨興一場旺產曾令淮南商人領項買運是商人辦運總爲民食而

南北場鹽均可相濟見在淮北三場產旺商人配運有餘似可仿照舊案暫資接濟見令運司選派淮南殷實數商酌定收買捆築規條於生息銀內量撥前往按照北商收買斤重價值配運南引運赴儀所掣摺開江分運口岸

乾隆五十年六月鹽政全德奏淮南銷鹽口岸統計存岸在途引鹽俱可銷至八九月但須預爲籌備見將淮北引鹽循例撥濟淮南轉瞬糧船過竣鹽開啟板北商仍可趕運以還原額

乾隆五十一年六月鹽政全德奏淮北引鹽因近年河南

上江各口岸運艱銷滯積引太多奏蒙提出丙午綱免其捆運是口岸銷鹽雖少場竈產鹽未虧今旣停運一綱竈戶未免有鹽無售查淮南通泰各場上年被旱蕩草歉收煎熬較少產鹽不能足額今淮北旣有存鹽正可以有餘濟不足請撥淮北多餘之鹽令淮南各商買運赴儀改捆濟岸奉

旨俞允

道光十五年六月兩江總督兼鹽政陶澍奏淮南通泰二屬場河因曠乾日久乏水濟運其煎鹽各場地亦因雨少涵氣不升以致缺產甚多鹽價增昂見在挑辦場河

雨勢亦經疊霽人情歡定第絀產已久場價一時未能  
平復查淮北三場向係曬埽收鹽本年晴多產旺計除  
票販運行之數尙有溢餘從前南鹽缺產採買北鹽歷  
有成案可循此時趕辦奏銷刻不容緩臣已飭運司轉  
諭各商如南場垣鹽不敷捆運卽暫運北鹽接濟或赴  
海贛場局或在王營西壩照票販一律購買運至揚州  
按包稱掣仍照淮南科則加納錢糧換給引張運赴各  
岸銷售其江運八岸係食北鹽前因無商承辦暫行官  
運亦須儲鹽接濟並飭運司籌款採買備用仍將各池  
餘鹽收買以免溢漏兼爲將來商販之需茲據運司詳

報查得官運池州無爲桐城巢縣等岸引鹽除納課及歸還成本外約有盈餘銀八萬兩係屬不入課額外款足供採買北鹽之用已飭總辦委員及海州分司領銀赴場按照例價督同場員收買十餘萬引另行築廩封置備運將來察看情形如南鹽始終翔貴卽令南商承買分濟各岸或場價就落卽歸下年票運銷售以期南北轉輸利商便民奉

硃批依議欽此

同治四年九月署鹽政李鴻章札淮南各岸銷數正有起色約計年內需鹽二十三萬引始敷運銷通泰各屬

亭場年久失修本已收不足額適值中秋挾旬陰雨更形缺收又河水泛漲異常駁船爲六閘所阻及至水勢平定而車薪壩座未堵轉瞬又慮河淺水乾瓜棧每月過鹽至多祇能三四萬引通計年內四箇月僅可掣鹽十餘萬引斷不足二十餘萬引之數商販挾資守運旣慮占擱資本各岸無鹽應銷更慮鄰私侵灌若不預爲籌計必至坐失事機有礙全局查綱鹽時淮南缺產向有借運北鹽成案本年淮北旺產小滿前後已收足一綱將餘鹽久存場池難保不透私占礙南北官銷正可以淮北之有餘補淮南之不足且楚皖久爲川票各私



侵占每藉口南鹽不能乾潔樂於食私今以淮北敵之可奏速效而廣銷路惟南販覬覦已久若淮其運行必致爭北停南營私勒費更慮沿爲成例莫固南商藩籬自應由官酌借行銷權操自上南鹽敷運卽須飭停洵屬南販北場兩受其益於鹺局亦有暢行之利見札西鹽招商局於預釐項下留存銀十餘萬以備撥作北鹽之價並令先撥銀二萬兩解交海分司作爲撥運之費卽於西壩存鹽內酌借北鹽七萬五千引計三十萬包合淮南鹽五萬引除青口局鹽質太次毋須撥借外以太平中富西臨臨浦四局本客池之鹽均勻配搭在壩

改捆照淮南章程以六百斤爲一引外加滷耗六十斤  
包索三斤半每引分作八包每包連包索重八十六斤  
選派委員在浦雇備船隻以六萬包爲一批分作五批  
統於十一月十五日以前全數起運由該分司備具護  
照運至瓜洲交棧稱收就船發販過入江船起運發販  
時與南鹽秉公配搭應配幾成每引作價若干詳悉妥  
議應專發楚皖兩岸其西岸向銷下色並無川票之私  
毋庸搭運以示區別所撥之鹽由該分司核實定價稟  
候撥款立即發還此係隨借隨還不准照抵課章程高  
擡包價撥借之後准各票販以原領大票加蓋戳記另

赴各局補摺如所定包價不實自可派員赴場照數捆  
鹽發還不得任令居奇亦不得稍事抑勒所借係壩存  
未運之鹽於湖運並無缺少既須補運應由商販仍按  
南鹽納課毋須先納北課以免重複責成該分司一手  
經理儻委員有夾私抽斤情弊及票販以醜鹽塘塞均  
惟該分司是問

同治四年九月瓜棧道員程國熙稟本年南鹽秋產本不  
甚缺見計到瓜已掣未掣者五萬餘引在途及尙未過  
泰壩者約八萬引八九兩月續收之鹽尙可源源重運  
惟年內僅三箇月轉瞬水涸斷不能運足二十餘萬引

借運北鹽以盈補絀官爲經理不由商辦亦權宜補救之良策再此項借撥之鹽年內必須運完以濟岸銷來春南鹽源源出場似可毋須再辦以固藩籬又此次北鹽南運西壩撥運係海分司之責到瓜稱收發販係棧員之責擬請委員三四人另雇稱手夫役官爲經理不經值月棧商之手亦毋須南掣稱掣以期事歸簡易經署鹽政李鴻章批准飭遵

同治四年九月海州分司運判沈炳稟查淮北本年小滿前後天氣久晴場產極旺餘鹽甚多亟須籌銷濟竈以杜私源曾將詳細情形稟請運司核轉在案今奉札飭

酌借北鹽七萬五千引核實定價運南濟銷遵卽傳諭  
北販議定鹽價僉以近年錢價高昂除付場商鹽價之  
外其運腳包索皆係用錢加以兵燹之後物價無一不  
貴轉瞬冬令水涸成本又須加增販等祇須後運之資  
得敷成本斷不敢高擡價值見在存壩之鹽已有三十  
萬包販等自當星速趕運以濟壩銷而備撥運經卑職  
覆核該販所陳均係實情是壩鹽三十萬包不難酌中  
定價惟船隻一項需用甚多必須一百數十號之船方  
能運六萬包一批之鹽清江地當孔道兵差絡繹船隻  
稀少須在揚州一帶雇用且鹽船運至瓜棧就船發販

分成搭派船戶停泊守候不能不酌給住日是水腳若干應以卸鹽之遲早爲斷況北鹽運南斤重不同在壩改捆由西壩運至清江別無水路可通需用土車裝載沿途拋撒上船滷耗通盤核計是否與南鹽價值不致低昂今昔情形不同未敢懸定擬馳赴瓜洲所有鹽斤水腳與棧員悉心籌議會同商定一面將章程馳稟卽行回壩辦理南運各事宜總期裕課恤商兩有裨益鹽政李鴻章批揚州一帶船隻不多且須撥運南鹽未必有船可雇查清淮山船俗名西河牛者質笨頗能重任應卽就近雇用以期迅速

同治四年九月瓜棧道員程國熙海分司沈炳稟伏查南鹽改道後適值江湖盛漲七八兩月鹽船不能出閘挽運維艱以致耽延時日見在水勢漸退設法催趲運抵瓜壩已掣未掣者約五萬餘引泰州已未過壩及場河起運之鹽約八萬引八九兩月晴霽日多霜降後連日西風諺云一夜西風十萬桶察看情形場鹽尙不甚缺但駁船僅止此數而各壩尙未堵閉冬令水涸轉運勢難迅速誠如憲諭年內僅能掣鹽十餘萬引斷不足二十萬引之數借運北鹽以盈補絀官爲經理權操自上亦權宜挽救之一法查北鹽由西壩至清江不通水路

必須雇車發旱每包約拋撒半斤由清江上船至瓜州  
每包須給船戶涵耗一斤北鹽向用邳桃蒲包其質較  
厚喫涵較重比淮南包索約重二斤則每包須加捆三  
斤半今議西壩改捆時照此核算斤重總以到瓜稱收  
每包八十八斤爲准秉公稱掣免致江販到岸暗受包  
厚涵重之累應請札行招商局於北鹽南運護照內注  
明八十八斤並通行沿江關卡一體遵照至撥運北鹽  
由官赴場局重運雖成本較輕而見在冬令場河水勢  
日涸雖經築壩而重載駁運究恐未能迅速且須赴邳  
桃二州縣定買蒲包有需時日目下淮南盼鹽孔亟應



先就西壩捆運以濟急需已面諭票販不准照抵課章  
程高擡包價亦不准照西壩售價稍求餘利查西壩見  
在售價上鹽每包一兩五分次鹽九錢五分卽以次鹽  
而論扣除錢糧四錢票販淨得五錢五分此次撥借之  
鹽准該販等另行補運其應繳折價捐款等項前已完  
納毋須再繳祇能核其成本連棧租辛工火食不使賠  
累每包酌中定議折曹平銀四錢二分外加拋撒涵耗  
蒲包三斤半計價一分五釐共計合銀四錢三分五釐  
通盤核算該販等僅敷成本並無餘利以南鹽五萬引  
計之共計四十萬包擬以四萬包爲一批分十批運解

如壩鹽不敷撥運隨時給照赴場捆運其由場捆運之鹽俟開辦到壩後再將成本另行核實稟報惟近日淮揚一帶船隻稀少覓雇頗難十一月十五日以前全數起運爲期僅一月半恐難依限完竣惟有設法雇船寬給價值分批運解源源接濟期於迅速復查此項北鹽淮帶來太平中富西臨本客池臨浦各色鹽樣以淮北而論西臨臨浦爲下以淮南而論西臨之鹽最爲相宜但不能全運西臨仍須以太平中富酌量配搭今與南場最上之呂四鹽色比較潔白相等而顆粒較大呂四鹽色全係提尖昨於講求鹽色增減牌價案內議將呂

四鹽價每包增加五十文以杜暗長稟請運司核轉在案茲公同核議此項北鹽擬照呂四牌價每包加增三十文計每包售錢一千二百八十文又收運販津貼船價錢一百一十文共一千三百九十文每引八包共收錢一十一千一百二十文以七錢三分合曹平寶紋八兩一錢一分零除歸還海分司成本及完納南課釐捐局棧各用外每引盈餘曹平銀一兩一錢零以五萬引計之約可盈餘銀五萬五千兩至如何發販分成配搭尙須會同招商局傳集運販議立章程務期平允又此項借撥北鹽原爲接濟岸銷必須迅速以淮南五萬引

計之約需成本銀二十五萬餘兩成本見成則籌運較  
易見在西鹽招商局預釐項下除已解西壩二萬外聞  
尙存銀五萬餘兩加以來年秋綱尙可收銀八萬餘兩  
二共銀十三萬兩應請札行迅速委解兌收以便趕緊  
辦運其餘銀兩擬俟頭二批北鹽運到趕速銷售提出  
鹽價十萬兩零先行委解歸還成本之數其餘銀兩應  
解何處並請示遵又查見運南鹽仍照稅鹽之例每千  
引完納揚由關稅庫平銀六兩六錢七分免報船料此  
次借運北鹽自應仍照南鹽之例每千引完納揚由關  
稅銀六兩六錢七分於定立交單時由總局扣存彙解

運司轉解關道兌收免報船料惟北鹽自清江至瓜洲  
須由淮關經過照例亦有鹽料稅但此次借運北鹽係  
屬籌濟岸銷一時權宜之計並非常年如此且官爲經  
理所有盈餘一概充餉非商運牟利者可比應請迅速  
咨明淮關監督隨到隨卽驗照放行免完鹽稅船料庶  
可趕運濟銷不致留難停頓矣經署鹽政李鴻章批查  
會議鹽價斤重駁運各事宜均屬妥協仰程道轉移海  
分司卽行遵辦候札飭張道將存銀十三萬兩委解應  
用將來盈餘銀兩應解本署部堂行營濟餉提還西局  
釐銀十五萬兩隨時稟明聽候撥解並候咨明淮關監

督免稅速驗放行以濟運銷

同治四年十月鹽政李鴻章批海州分司運判稟壩銷暢  
旺淮南借運之鹽擬先分撥兩批其餘後鹽隨到隨撥  
並由該分司購備包索委員赴場捆運以補販運之不  
足所辦均是仰卽儘力催趲總須格外迅速以年內運  
足爲妙不准藉端耽延至恐淮南以有鹽到棧爲詞無  
須借北則不必過慮此五萬引已發官本銀十五萬兩  
斷不能半途中輟也

同治四年十月署鹽政李鴻章請淮關免稅咨竊照兩淮  
鹽務南運北鹽向有成案見因淮南岸銷頗暢場鹽缺

產酌借北鹽五萬引藉資接濟就已到西壩之鹽委員  
捆運分十批解赴瓜洲交瓜棧委員搭配發販以期迅  
速運岸銷售完釐濟餉惟查北鹽自清江至瓜洲須由  
貴關經過從前商運北鹽曾有完納關鈔之案此次借  
運北鹽係由官爲經理所有盈餘一概充餉非商運牟  
利可比已難援照舊案辦理况一切章程悉照南鹽科  
則祇完南課不復重完北課關鈔事同一律旣照南鹽  
已完揚由關稅未便再完淮關鹽鈔致增成本而誤軍  
餉相應咨明俟前項北鹽運瓜之船到關請卽免稅速  
驗放行勿任胥役人等藉端留難足紉公誼

謹按此事嗣據淮關監督世榮覆咨援照成案仍應  
納稅與鹽政李鴻章往返咨商卒從監督議另詳淮  
北關稅篇

同治四年十一月瓜棧道員程國熙稟准楚鹽招商局三  
次移送湘鄂各商販配買北鹽花名引數清單酌核配  
運前來查借捆北鹽五萬引前經酌擬配運湘鄂兩岸  
四萬引皖岸一萬引原稟由海分司委員分十批運解  
是每批應派五千引當此皖岸需鹽萬分緊迫擬於每  
批到瓜先配皖岸一千引次配湘鄂兩岸四千引惟皖  
岸招商局遠在大通移送買鹽花名尙需時日業據皖



岸各商販以皖岸暢銷盼鹽孔亟陸續來棧稟驗買鹽  
照單請予配運北鹽前來自應卽以具稟之先後分批  
挨次配捆查湘鄂兩岸引數較多見准楚鹽招商局來  
移湘岸共計二萬七千一百引鄂岸共計一萬一千二  
百引若令各商販來棧稟驗買鹽照票掣籤配捆恐北  
鹽分批運解未能迅速非所以示體恤茲悉心酌議擬  
卽查照楚鹽招商局來移所開花名先後爲序預爲榜  
示棧前俟北鹽分批運到再行飭知來棧訂立交單前  
赴總局呈繳鹽價聽候挨序過掣仍以上半綱之引開  
列在前下半綱之引開列在後以昭平允其餘尚未配

足之一千七百引爲數無多擬請暫緩發販留爲淹消  
補運各販認買如將來仍有餘存再行隨時酌量辦理  
鹽政李鴻章批北鹽運皖深恐官私混淆祇淮配運已  
經買定之二十二票業於另稟批示至北鹽鹽色潔白  
江販爭買配運之法自宜就給單買鹽之販請運南鹽  
五百引定配北鹽若干引不論大商小販一律勻配以  
配足五萬引爲度方昭公允若任江販自行配買則有  
情有勢者搶買多包無情無勢者不得片引辦理稍有  
參差卽開取巧之弊來稟祇敘捆掣之先後究竟如何  
按販配買未據聲明發販爲該棧之專責應由該道確

定畫一章程不至稍有弊端

同治四年十二月瓜棧道員程國熙稟楚岸配運北鹽花名引數見准楚岸招商局分別湘鄂開單移送前來自應以單開花名之先後爲瓜壩過鹽之次序但引數甚多若俟此岸過竣再過彼岸未免有稽守候不足以示體恤茲擬定先過湘岸一號次過鄂岸一號周而復始挨輪過掣以昭公允經鹽政李鴻章批此項北鹽五萬引除皖岸已買二千四百引外其餘自應鄂湘兩岸各半分配何以摺內配運之數湘岸較鄂岸多配一萬六千九百引其鄂湘兩岸見在買鹽各販是否人人配運

抑有向隅之戶其配多配少並無定章祇憑招商局開單難保別無情弊仰卽遵照前批刻日議具妥章飛稟察核瓜棧又稟查北鹽南運原以補南鹽之不足必須搭配均勻無偏無倚方爲平允本擬查明鄂湘各販未經買鹽者無論大商小販分成配搭而未經買鹽各販究有若干卑棧無案可稽是以移會楚鹽招商局查明移復旋准移送花名清單前來逐加察核鄂販恆和等尙未買鹽者共一萬零二百引湘岸聚和元等尙未買鹽者共二萬七千一百引總共三萬七千三百引尙不足北鹽應售之數且查恆和等均係大販認引甚多並

非專買北鹽是以准其照買出榜曉示並開摺報明在案奉批前因自應遵照辦理惟查自開棧至今南鹽抵瓜已十六萬餘引除已掣十萬餘引外尙未過掣五萬餘引均經各販買定若以北鹽配搭而北鹽報到祇五千引數目懸殊難以勻稱且已立交單已經繳價責令悔交南鹽若干配買北鹽若干商情亦多未便若就未經買鹽之販分成配運而言則楚岸招商局三次來移舊綱未經買鹽者僅有此數新綱甫經開辦舊綱尙未運完似難配給新販思維再四此次借運北鹽五萬引除奉准皖岸二十二票共二千六百四十引外應歸鄂

湘兩岸配運鹽四萬七千三百六十引見僅配買三萬七千三百引仍有一萬零六十引尙無售主北鹽雖稱潔白而照淮南上等之呂四牌價每包增加三十文成本較重尙無爭買取巧等弊鹽政李鴻章批據稟覆鄂湘各販其買北鹽三萬七千三百引准楚鹽招商局三次來移舊綱未經買鹽者僅有此數則各販皆已買定南鹽可無怨言應照該道原議辦理以免紛更

同治四年十二月鹽政李鴻章奏查同治四年正月起至六月底止共收課釐銀一百三十九萬六千九百十兩有奇又收鹽釐銀十五萬五百二十七千有奇收數漸

增而剿捻及留防遣撤各軍待用孔亟爲數甚鉅業經  
隨收隨放臣查鹽務以口岸爲藩籬以場竈爲根本場  
產日多斯岸銷日廣從前淮南盛時商力富厚二十場  
鹽積如山堆儲愈久色愈潔白自軍興後亭荒鏹廢各  
場產鹽不及原額十分之五請運涌旺時有缺鹽之慮  
見飭運司督令鏹商廣添新鏹發場供煎而淮北場鹽  
係由曬埽而成收垣較易存鹽足資轉輸臣酌盈劑虛  
仿照成案官爲籌款添購北鹽七萬五千引合南鹽每  
六百斤計五萬引運南濟銷應完課釐悉照淮南新章  
辦理以北場之有餘補南場之不足今冬來春銷市無

虞缺乏但冀楚西鄰私不致到處侵灌淮南鹺綱當有起色五年九月戶部議查上年十二月該督奏報同治四年上半年淮南課釐數目摺內聲稱淮南繳商煎鹽不敷領運請添購北鹽七萬五千引運南濟銷欲以北場有餘補南場之不足本部查此項借運鹽斤名爲協濟南運實係融銷北滯淮南全改稅釐徵收祇憑造報淮北留存引額部中尙可稽查所有淮南借銷淮北鹽斤應如何按照融銷實數盡撥淮北引額之處行令轉飭所屬妥議辦理該督總理鹺綱淮北淮南原屬無分畛域惟部中專司綜核總期規復引額以保課餉而重



考成

兩淮鹽法志卷八十四

兩淮鹽法志

卷八十四

晉銷門

借運北鹽

兩淮鹽法志卷八十五

督銷門

淮北督銷

票法之興自淮北始迨粵捻橫行臨淮江北紛紛置帥  
漕督皖撫各自募軍於是以鹽抵餉暫作權宜之計而  
桀酋叛練亦皆捆運自給餉鹽之害不可究詰曾國藩  
悉奏除之撤關卡停餉鹽減溢額以恤商併鹽釐以裕  
課與民更始民氣大蘇其成法宜循而勿改也志淮北  
督銷

整飭票法

同治三年鹽政曾國藩釐定淮北票鹽章程第一條改復票鹽舊制第二條接開己未新綱第三條核定正雜各款第四條裁併各處釐金第五條分派課釐數目第六條計算成本餘利第七條嚴杜夾帶重斤第八條禁止出湖改捆

謹按以上八條詳載淮北票法新章茲僅標其目以存梗概

同治三年鹽政曾國藩札照得淮北見定章程裁併釐金議以五河設卡每包收釐錢五百文運赴上游再於正陽關設卡每包收釐錢五百文抽收之後給予釐票他

卡驗票放行不准重抽以輕商本釐金按十成分派以一成解漕部堂衙門四成解安撫院行營五成解本部堂糧臺積有成數卽行按成分解所有五河卡業經本部堂派委賀令霽若正陽關卡派委唐守景皋管理特札該分司知照

同治三年六月署海分司沈炳呈稱五月中旬內有舊票鹽運到壩適奉發到新票二千張自應於繳課開除時換給運售惟到壩大票平上兩角已經該管局員及大伊山卡員掣驗截角今新票若仍發回局卡截角場官蓋印誠恐展轉需時湖販勢難久待擬卽由卑分司蓋

印代截平上兩角以期迅速按包繳課出湖應請飭行  
五河正陽二委員知照俾免周折至開綱新販已請一  
萬一千五百引因新票須留一千張爲見到舊鹽換票  
開除之用卽不敷分給其餘一千張由卑衙門俟新販  
鹽運到堰查明實數填給兼杜占票緩運之弊仍由場  
蓋印局卡截角以符舊章經鹽政曾國藩批允

同治三年七月海分司沈炳稟奉憲批換給新票之鹽前  
經批令該分司在於已完之四分六釐六毫雜項內提  
出見銀三分收入新章茲據摺開票販鴻吉祥等改作  
新鹽六百十引僅據每引收銀五分一釐其應於舊章

內提出之三分未據列收仰卽遵照前批補作支收嗣後旬報清摺鹽與課應分兩摺鹽摺將請運各花名逐一挨填課摺將正雜各款分別開列以清眉目而便稽查舊章清摺內應將漕轅濟餉及李營已捆未運之鹽一併查明開報等因遵查卑職任內票販其請舊章大票三十三萬四千餘引應存鹽捕營一分業經批解運司在案茲截至五月初八日開綱前一日止舊章已運到壩八萬六千餘引新章尚有未運二十四萬七千餘引照每引倉穀河費各一分二共計銀四千九百餘兩茲卑職提出銀五千兩爲解安慶糧臺餉鹽水腳之用

一俟舊票運鹽到壩一律改換新票統除統算仍於摺報註明其不敷水腳銀兩卽在新收八分一釐及補收五分一釐內動撥是此項應提三分已經全數躉提較之每次零星列收似爲整齊嗣後旬報遵批將鹽與課分別開列以清眉目至漕轅濟餉及李營已捆未運之鹽一併查明統於下旬開報以便稽查經鹽政曾國藩批換給新票之鹽應於舊章已完雜項內每引提出銀三分據議躉提銀五千兩作爲安慶糧臺餉鹽水腳之用俟改換新票之鹽運畢後統除統算事屬可行准卽照辦其不敷水腳仍遵前批在於本部堂應得五成課



內及倉河經費項下借支應用至稟內所敘該分司任  
內尙有未運舊章鹽二十四萬七千餘引此項開綱以  
後其已運在途者不能半途輟自應改作新鹽換給  
新票其已認未運之鹽應遵前札一律停止將殘票弔  
繳運司核銷以清綱分而免糾轆若准全數換給新票  
則未開綱以前先認二十四萬七千餘引開綱以後截  
至六月二十日止又請六萬四千餘引是已未綱已逾  
綱額無此辦法仰卽查明已運在途應換新票者若干  
引已認未運應行弔繳舊票者若干引已未綱定額二  
十九萬六千九百八十二引內除應換新票之鹽外其

鹽法志卷八十三  
餘新引統歸商販陸續認運足額卽行截數又認運新  
引應仿淮南立限開江之例定限兩箇月運鹽出場逾  
限不運卽行註銷以杜空認賣票之弊

同治三年七月署運司忠廉詳據沈運判稟稱查禁止湖  
欠一條淮北當滯銷之時每有放欠換貨等弊或小販  
亦有利在轉輸跌價搶售最爲鹽法之害而不肖賣手  
夥友人等希冀中飽暗中代爲交易在所難免今擬嚴  
定章程無論銷市暢滯凡於票鹽出棧時查明並無搶  
跌賒欠換貨方准開除並諭各棧戶出具切結如有陽  
奉陰違查出卽行懲究儻有票販不遵示諭串通棧戶

復蹈前轍致被拖欠者除不准理外仍行示罰以儆其餘至三河尖正陽關既有督銷委員韓運判應請飭知明定官租不得搶跌嚴禁行欠換貨並船戶短斤少數一併妥議章程以除積弊又設卡緝私一條查淮北私鹽東路由場至壩已嚴飭印委各員認真巡緝由壩出湖至十二堡係爲鹽船總匯之區其餘西路由水陸繞越臨淮者尤復不少今擬請選幹員前赴十二堡及臨淮一帶設卡稽查第恐皖省道路較遠鹽務呼應不靈所有臨淮一卡自應並請安撫憲加札飭委經理更易得力惟稽查鹽船應以大票及本年新章高良澗委員

所發海分司蓋印艙單爲憑如數目相符卽蓋戳放行如鹽多於票卽係夾私應將夾私之鹽充公懲究如無大票艙單其爲販私無疑立卽嚴拏從重治罪以期私靖官暢各等情詳請核奪經鹽政曾國藩批允

同治三年七月鹽政曾國藩批海分司稟弔繳舊票一案查淮北近年票販認引之後遇銷暢則互相爭運遇銷滯則日久虛占以致新販到壩無引可請必向舊販出銀買引分司因已收雜款故凡開新綱必請新舊並行不但前後套搭新鹽皆被舊引占礙且綱分額數永無清理之日是以本部堂前定新章時飭將舊票呈繳又

因已運在途之鹽未便令其中輟准其換給新票作爲新鹽係屬格外體恤見在開綱已兩月有餘舊鹽陸續到壩在途者定必無多應由該分司查明將換給新票一層停止所稟賴武兩任內尙有未運舊票三萬餘引此項大票延擱數年之久豈容再准辦運自應一律弔繳至各舊販已完雜款應分別等差辦理本年新綱係五月初八日開辦所有弔繳各舊票應查其認引日期先開綱三箇月以內者准將已完雜款在舊章經費售價項下全數給還在半年以內者給還一半半年以外者誤運之咎已無可辭應將已完雜款一概註銷仰卽

示諭各販嗣後舊票不論何任內發給限一箇月內全數繳清詳報以杜糾轆而絕弊混

同治三年九月署海分司沈炳稟查淮北票鹽從前極盛時先課後鹽每於開綱不下數百萬兩卽將本綱之課收清以垣鹽上中下三等按引搭派籤掣填發大票各販赴場重鹽將一綱之引全行到壩銷售場商亦必於小滿前後將一綱之鹽全行收齊以供票販之用故得年清年款並無積引迨後銷市日滯販本占攔改爲先鹽後課每年儘徵儘解卽不能按綱全清續因北課全充皖餉湖路阻塞片引不行又改爲以鹽抵課原係一

時權宜之計上年苗逆伏誅湖路肅清乃奉札飭停止  
餉鹽仍復舊制徵收課銀曾經將舊票運到之鹽換給  
新票改作新鹽收課按旬開報並稟明新章認引票販  
於鹽運到堰由卑衙門查明鹽數填給大票均經稟奉  
批准各在案竊以此次改章新舊之區別重在繳鹽與  
繳課兩端餉鹽既經停止則續到之鹽無論新引舊引  
概令歸入己未新綱一律繳課卽與新引無異見在批  
飭將換給新票一層停止應卽遵飭辦理緣今昔情形  
不同有二從前先課後鹽驗資完課係以派引之數爲  
足額今則鹽運到壩售鹽完課應以收課之數爲足額

雖請引已逾一綱之額而運鹽不足一綱之數此今昔完課情形之不同一也從前鹽價歸庫飭發掣垣赴捆今則鹽價自付有先行付價而鹽待續收者有已捆一半而鹽未全運者有場商無力隨收隨售不能應期而捆者此今昔捆運情形之不同二也卑職再四思維惟有仰懇俯念認運在新章以前完課與新章無二凡卑職任內認運之引准其趕運到壩換給新票照章完課卑職仍當隨時查核實運到壩之鹽已足二十九萬六千九百八十二引卽行截止不得重運溢引可否免其立限出自恩施經鹽政曾國藩批查已認舊鹽本應一



概截停惟據該分司瀝陳今昔情形不同殊多窒礙姑  
念換給新票照章完課尙與新引無異准如所詳辦理  
但連新引並計運足二十九萬六千九百八十二引應  
卽停止斷不准再運舊票之鹽亦不准新販多運以清  
綱分而符引額至認運新引定限兩箇月出場係專杜  
空認賣票之弊其較之淮南定限雖有由場到壩由壩  
出江之別然兩月爲期大致已不甚迫儻因公稍遲如  
河淺鹽少之類未能依限出場不妨量予變通應由該  
分司隨時酌核稟報毋庸預請免其立限致滋弊端

同治五年五月海分司沈炳詳據順清河卡員章縝稟查

勘十二堡係洪湖大隄水陸通衢近來票鹽自楊莊受載至高良澗出湖十二堡爲必經之路卽遇冬令水涸由西壩陸運至高良澗上船大小鹽車亦必由隄上經過於該處設卡稽查洵爲水陸扼要惟湖隄居民稀少並無餘屋可租必須在扼要之區建造卡房並於河口設立檔木以期水陸兼查免致透越仰懇憲恩俯念查驗截角係屬要差准其建立卡房藉資辦公其應需銀兩在於經費項下開支經署運司程桓生批准

謹按順清河濱臨黃河向爲稽查票鹽出湖最要之區嗣因豐工決口該處船不能行歷年移駐太平公

地方稽察不能及遠故改於十二堡設卡卽於彼處  
驗票截角

同治五年五月海分司沈炳稟遵查淮北三場向設五局  
板浦場之太平局鹽色有上中下三等之別西臨局有  
中下無上戶中正場之中富局鹽色有上中無下戶臨  
興場之臨浦局青口局鹽色均係下戶並無上中當票  
鹽極盛之時按照額引配搭籤派迨至軍興以來壩銷  
疲滯臨浦青口之鹽色粒俱下販既不運商亦不收所  
有辛酉下綱認運臨浦青口下戶之鹽擬請每引酌減  
經費二錢一俟壩銷暢旺仍行照舊徵收再各場各垣

之鹽上中下均按四十六萬額引核計見照二十九萬  
六千餘引不能不酌盈補虛以場分收鹽之多寡定額  
引之大小凡認運上戶者此垣上鹽足額卽認他垣上  
鹽其中下垣鹽一律照辦不得以存有餘鹽致令混淆  
設屆期此垣鹽不足數准其稟請以他垣鹽改撥俾免  
誤運經署鹽政李鴻章批檢閱派引清摺按照定額酌  
盈劑虛尙屬精細至臨浦青口最下次鹽前本飭令歸  
入下戶一律辦理茲據漚陳該兩局之鹽本重路遠額  
引幾同虛設仍請酌減經費二錢係爲力求疏通起見  
暫准照辦仍俟請運稍旺酌量加收以符舊章

同治六年十一月鹽政曾國藩批海分司稟西壩售價一案前因銀價日昂湖販利微經本部堂酌定上色每包不得增至一兩以外次色每包不准跌至九錢五分以內刊頒示諭飭遵在案減價以後票販餘利亦已稍薄而場商上年業已酌加鹽駁價一錢此時斷難再增卽下網銷數暢滯難以逆料毋庸預行籌議

同治六年十一月鹽政曾國藩批海分司轉稟各販公呈一件查售價爲鹽務最要關鍵本部堂核減壩價之示係確加采訪通盤籌計始頒此令輕湖販之成本以保票販之銷市非厚於湖販而薄於票販也細閱各販公

稟言未盡實試卽票販之本計之其不實者有二下綱  
酌復駁價一錢昨據該分司具稟業經批駁不能將未  
經奉准之事先作藉口之端此不實者一也票販成本  
刊章每包祇定七錢四分零近加鹽駁價二分五釐漕  
捐七釐五毫及先課之官利約不過合銀八錢卽照來  
稟售一兩一錢零獲利在三錢以外乃謂所沾餘利每  
包一錢零此不實者二也又卽湖販之本計之該販等  
所開不實更多卽如釐金錢價每兩祇准作錢一千四  
百文每包完錢一千文合銀七錢有奇昨甫據王守稟  
請酌增准作一千四百五十文合銀亦不止六錢四分

又正陽旬報售價雖定上色每包二兩八錢其實總不  
過二兩五錢上下又鹽到正陽定章祇准先賣二成作  
完釐之用其餘八成均應繳釐再賣並非全數賣而後  
繳又售鹽不能一律見銀須搭貨物暗虧不少又湖販  
尙有正陽塘工捐漕轅河工捐均未據逐一開列而謂  
每包可沾餘利六錢八錢其能折服湖販之心乎至壩  
銷口前雖未見滯而銀價日昂皖豫水販赴總局買鹽  
以錢合銀每包須增七八百文岸價暗漲已伏滯銷之  
機不可不遞減局價使水販受益以廣招徠本部堂昨  
已批飭王守速議以上各層該販等熟於營運豈有不

精會計之理祇因前兩年獲利過厚狃於私見未籌全局該分司率代轉稟殊屬非是本部堂不輕聽言不輕發令此案既已刊示通飭自必確有所見仰卽督飭各販遵示出售如有暗漲暗跌情弊定行提轅嚴究

同治八年三月鹽政馬新貽札照得西壩售價上色每包不得增至一兩以外次色每包不准跌至九錢五分以內正陽售價上色每包二兩五錢中色二兩四錢五分諭商販務遵定價出售凡奸商暗增暗跌在壩難瞞分司在岸難瞞局員必須查明稟辦一二方足以儆其餘保價爲目前至要之策該分司務須破除情面實力整



頓此札之後如再陽奉陰違一經察出定惟該分司是問

同治八年十二月署海分司許寶書稟淮北票鹽定章湖販赴棧買鹽自西壩運至高良澗出湖除例定鹽駁價之外不准需索分毫厯遵憲示奉行在案近來湖販本重利微推原其故因壩價之暗增而實由於浮費之過重查湖販自西壩運鹽至高良澗出湖其鹽棧使費以及各卡黑費每包竟有百餘文之多而黃河船價楊莊盤駁等項尙不在內無怪湖販成本暗加觀望不前也此等黑費似應嚴禁見在卑職擬將必不可省之句損

日計以及出棧車力酌給每包二十五文其餘鹽棧內各項使費並西壩楊莊順清河高良澗各卡查艚驗票等項黑費卑職出示一律禁革不准再有需索分毫並嚴飭各卡員一體示禁以輕販本而保鹺局經鹽政馬新貽批准北湖販成本逐漸加重由於浮費過多自應從嚴禁革據稟酌留勻損車力等款二十五文其餘各項黑費一概革除所辦尙是仰卽分別出示通飭仍由該分司就近查察如敢陽奉陰違立即稟請嚴辦

同治十一年正月鹽政曾國一示照得淮北票鹽經本部堂奏定新章場商鹽駁價每引七錢嗣據沈運判稟准

酌復一錢每引共八錢票販捆鹽出場每包正引滷耗共一百十斤不准重斤夾帶煌煌定章宜如何永遠遵守茲本部堂訪聞場商票販日久弊生鹽駁價近來暗中遞增每引另加一錢及貼色名目有二錢三錢不等者包內重斤每包有多至二三斤及五六斤不等者推原其故皆因票販欲求上色之鹽不得不貼暗價垣商既得暗中之費不得不放重斤種種取巧彼此營私實於票法大有關礙見在開辦丁卯新綱亟應嚴行查禁以祛積弊而符定章除飭海分司督飭場局各員實力整頓外合行出示曉諭爲此示仰場商票販人等一體

知悉自示之後務各遵守舊章鹽駁價祇准八錢不得暗增貼費場鹽到壩每包祇准一百十斤不得暗放重斤儻敢陽奉陰違私相授受卽由該分司查明稟請嚴辦一面將場垣充公票鹽扣引以示懲儆如局卡各員任意需索知情故縱並由該分司一併查明稟請撤參同治十二年三月運司方濬頤詳據海分司以票販場商成本加重請酌加壩價鹽價一案經鹽政李宗義批查西壩售價每年竟有每包售至一兩二錢以外者各票販暗中私擡實屬有違定章惟票販成本較前加重與曾前部堂定價時情形不同本部堂持平酌核所擬上

色每包售二兩一錢五分尙嫌浮多應定上色每包不得增至一兩一錢以外中下色每包不得跌至一兩以內壩價既增場商鹽駁價亦應酌加每引准給銀八錢五分凡加耗貼色等名目一概革除

同治十二年六月鹽政李宗義札淮北三場各局於同治五年經李爵部堂批定將經費分別酌復黑費概行革除勒石永禁在案乃日久玩生場局各員非但不能潔清自矢且又增出名目任意需索先經張署部堂飭司派委張運判前往確查本部堂蒞任後深知其弊復經密加訪察茲已查有細數凡蓋印截角鉤損三項均敢

照舊收取又添損底幫項門丁書役等項中富局幫項  
一款逐年遞增竟至每百引索錢至二千六百六十六  
文之多實堪痛恨太平等局局商亦有幫項帳房門房  
等費並有拉岸稱手兩項索費更重拉岸每百引索錢  
四五千不等稱手每百引索錢七千至十千不等尤屬  
可惡既已查有確據本應將場員局委局商分別撤參  
姑念該司先已派委會同分司查明詳請革除不爲已  
甚惟該分司能否遵照新定章程實心經理各場局能  
否恪遵功令不再格外需索局商票販有無私相授受  
情弊本部堂仍必隨時密訪該分司耳目較近如有聞

見必須據實稟揭以免代人受過即便嚴飭各印委並曉諭商販人等痛改前非力除積弊儻敢仍前需索一經發覺或被指告定行從嚴參辦再該分司前詳所稱鉤損一項應確查實給數目稟明酌留等語並即催令趕緊查詳勿任朦混

同治十二年十二月海分司于寶之稟壩鹽售價上色每包不得增至一兩一錢以外中下色每包不得跌至一兩以內當卽錄批曉諭在案本年六月間風聞尙有一二販未能盡守定章當傳該湖販等委婉開導僉稱販等在壩買鹽均遵定價何肯暗加絲毫自增成本等情

取具切結各在案己已開綱後卑職稟立售鹽公所票  
販輪流值日稽查較倍周密所有壩價均遵定章悉歸  
一律票販賣鹽銀色本無定案從前改票之初場垣鹽  
價由販繳庫向係合寶庫中卽照原收銀色發給見在  
價歸自付場商而票販取價皆係足平雙寶而應完課  
項更係庫平足色票販所出之款旣皆足色而所收湖  
販鹽價自應統歸一律免致偏枯應請立案不准再有  
九九兌名目以杜參差滋弊經鹽政李宗義批允

同治十三年九月運司方濬頤稟據海州分司于寶之稟  
淮北所屬太平中富西臨臨浦四局引費係照二十二



萬引每引五釐核定每年各支銀一千一百兩嗣因銷  
滯課絀經費不敷開支曾於咸豐三年開奉前憲減爲  
雙八折支給同治五年四月開奉前升憲丁札以裁革  
各費案內酌復公款以公事之繁簡定經費之多寡太  
平局掣鹽較多准復八折再復一折中富局准復八折  
西臨局准復一折臨浦局俟運鹽時再行酌復等因遵  
經按數支領在案復查臨浦局當時片引不行公事無  
多是以未經酌復近年以來額引照折攤派見已增至  
二萬九千引較之西臨額派尙多公事不無較繁而應  
領引費仍照原減銀數支領辦公恐有不敷擬請援照

西臨局之例酌復一折由司請示經鹽政李宗義批據  
稟臨浦局引費前次丁前司議復各局卡經費稟內聲  
明俟鹽運時再行酌復等語核案尙屬相符該局近年  
額引既已攤派三萬九千引如稟准復一折以資辦公  
光緒三年五月海分司于寶之稟奉札開淮北票鹽出湖  
向給艚口清單見在壩鹽不准改捆此單按艚點包尤  
爲緊要未便因撤高良澗卡卽將艚單並撤令將前項  
艚單改由移駐十二堡之順清河卡員於截角時查明  
每艚包數隨時填給札飭遵照辦理一面議飭該卡員  
約束丁役不准藉端索費致干重咎卑職遵卽刷印艚

單飭發順清河卡員於鹽船過卡大票截角時查明每  
艙包數照章填給經鹽政沈葆楨批據稟壩鹽不准改  
捆一案已於四月二十九日出示曉諭責成卡員棧戶  
遵章捆交聲明由該分司不時抽查與本部堂前批令  
該分司親自抽掣尙相脗合該分司辦事果否實心卽  
以此占之所稱順清河截角後恐販等沿途加灌固難  
保其必無但由於出湖時有改捆之弊過卡時有補釐  
之弊各販始敢買私加灌貿易之道計較錙銖黠販加  
灌而良商獨不加灌必致折本其相率效尤勢所必致  
是皆委員使之如是並非湖販甘心犯法今旣概不改

捆到五河查出重斤必須照全船扣罰充公則該販等無可遷避何敢以巨萬重資自投羅網卽如淮南長江千數百里運商鹽船連檣上駛私鹽到處皆有從未聞有沿途加灌之事無他稽之嚴罰之重也該分司整頓伊始先以湖販中途加灌爲慮豈預爲卡員卸責地步耶本部堂但求改捆補釐兩弊一掃而空則加灌不禁自除仰候札飭五河正陽兩卡實力嚴查照章提鹽仍將出示以後販鹽有無重斤夾帶及查辦情形隨時稟核

光緒三年十一月鹽政沈葆楨札據淮北湖販孫國治等

稟瀝陳困苦變通體恤等情除批查淮北舊章科則除  
完正雜課外每年另徵懸引協貼兩款五十七萬餘兩  
新章雖增五正兩卡之釐而免徵懸引協貼爲數甚鉅  
並非未設釐卡以前成本獨輕至釐卡不設西壩而必  
設於五河正陽者因路近則價賤俾該販等不過兩卡  
之鹽免其抽收尤曾前部堂恤販之苦心前數年暢銷  
之效未始不由於此目前東南軍務雖平而五正兩卡  
鹽釐專濟關外前敵緊餉且部中屢以五正下游所免  
之釐行文詰責卽便奏請減輕必干部駁該販等近來  
獲利之薄半由洪湖水淺因起駁而增費因增費而舞

弊始購重斤繼用廢票甚至到岸後放稱貼平百計逃輪近更有散艚套底之弊以到岸價暗跌利藪轉成畏境果誰之咎耶

國家原無百年不弊之法但其致弊之由非法不善皆由奉行者不善耳惟每屆菜市鹽銷極旺今則壩銷非常疲滯該販等歷陳苦困不盡無因非設法招徠難期踊躍見在鹽釐斷難議減而兩卡收解銀價統計每年尙有盈餘應如何酌量減讓以輕販本之處候飛札五正兩卡刻日會商妥議稟奪新綱部限已逾切勿稍存觀望致誤全局

光緒四年正月鹽政沈葆楨札照得淮北票鹽全賴湖販  
轆轤轉輸壩銷方有起色今該湖販到壩難免票販之  
盤駁抵正又受豫販之刁難兼之由壩至關種種糜費  
以致歇業居多壩銷愈滯亟應力圖補救除五正兩卡  
已飭每兩各讓錢價二十文外其餘應減應裁各款見  
經本部堂逐加訪查開列於後一西壩售鹽向分三等  
詳定上色每包售銀一兩八分中色每包一兩六分下  
色每包一兩四分近聞各票販將鹽勻配上中下三等  
如鹽一百包上中下每三十三包而價值則無分上中  
下統需一兩一錢顯違定章應由該分司驗明鹽色責

成各棧分別三等價值出售湖販與票販相表裏湖販少受一分之虧票販卽獲一分之益儻再暗擡售價察出嚴辦不貸一淮北各局卡浮費前經丁升司刊石永禁乃日久玩生又萌故智西壩楊莊十二堡三處驗票本爲查弊而設今弊未盡除而費轉多索累販伊於胡底聞西壩每包索錢一文楊莊每包索錢二文半十二堡每包索錢三文應由該分司嚴飭一律禁革並隨時密加訪察儻再不知自愛卽行據實稟請撤參一正陽之螺機船前經熊守稟請創造每包抽經費錢十文見查淮河之水銷漲靡常恐東流而西塞剛挖而旋復徒



費人工無甚明效應將前項捐銀停撤將來戴守備添造機船報銷盈絀另由廖牧安籌稟辦以恤商本

光緒四年正月鹽政沈葆楨示照得淮北票鹽西壩開除時給發大票護運至順清河改設十二堡卡查驗截角另給艚單立法本已周密惟出湖後隨地准賣散而難稽向來湖販並未於售鹽之後將票繳銷奸猾商販藉有廢票護私影射以致壩銷日疲難副部限查票鹽舊章本有四十天到岸定限近則視爲具文漫無稽考見經本部堂酌定嗣後該湖販等運鹽自十二堡卡截角給單之日起限十五天到五河卡自五河起限二十五

天到正陽卡逾限作爲廢票照章懲辦其遵限大票卽由該兩卡將釐金收清後在於大票上填註月日逐張鈐蓋某卡驗訖戳記其五河以下盱眙一帶售鹽馬頭由海分司揀派委員分赴各該處責成鹽行將售出販鹽應繳大票按數收回呈繳海分司衙門核銷按月呈報本部堂暨運司查考以杜弊混自示之後務各恪守定章依限販運切勿再蹈故轍自貽伊戚懍之

光緒七年十一月運司洪汝奎申竊照淮北青口一局徵稅之多寡全視銷數之暢滯而銷數之暢滯全視局員之勤惰查近年收數自光緒元年起至六年止報收數

目均係逐年遞減六年分祇銷七百五引顯係局員不力所致稅課爲正項錢糧豈容任意開報漫無稽核且聞該局歷年支解相抵其急公者尙有盈餘報解其取巧者率行全數抵支甚至以支款不敷借詞希冀找領者有之實非所以重稅課亟應明定章程以資整頓而益公項當經本司持平核議應將青口局醃切食鹽查照歷年銷引由海分司酌中定數茲據海分司查復青口醃切近年銷數不旺自應明定章程以期日有起色溯查從前各年銷數光緒元年分計銷鹽一千三百七十四引七分五釐二年分計銷鹽一千二百四十引三

年分計銷鹽一千一百二十引四年分計銷鹽九百五十九引五分五年分計銷鹽一千三十七引五分六年分計銷鹽七百五引通計青口醢切以元年爲最多六年分爲最少該局員程大使所稟歲銷豐歉情形亦屬實情惟不定以銷數總覺漫無責成就以前歷年銷數酌中核定每年應以一千二百引爲定數至奉飭照食岸辦法缺則包課溢則照完以重稅課自是核實杜弊之法惟商人常年認岸世守其業責以包課義無可辭局員按年更替似祇能按照催徵勤惰章程嚴定功過以示勸懲局員徵收醢切稅課應照在差日期將一年

派定銷數照十二箇月分成考核缺一成者記過一次  
缺二成者記大過一次缺三成者記大過二次缺四成  
者記大過三次溢銷二成以上記功一次四成以上記  
大功一次六成八成以上功亦遞加似此嚴定功過似  
於籌銷不致有名無實至青口局所領經費每年一千  
一百兩係照原定章程給領未經減折較之太平中富  
大伊山各員每年七百四兩之數似屬過優應請一律  
減折每年祇准支銀七百四兩以昭公允經鹽政劉坤  
一批允

光緒八年七月海分司張元愷稟竊奉札開據正陽卡湯

道稟船戶盜賣客鹽請飭海分司妥議章程以杜弊端而肅鹺政等情當批船戶盜賣客鹽最爲鹺務之害該道擬由海分司就近於西壩傳集各販船行公同妥議酌減水腳添給住日其住日之錢須到正陽守輪後再行給發係爲正本清源起見仰候札飭海分司妥議章程稟候核辦仍飭壽州務將脫逃船戶嚴拏重懲毋稍寬縱另單稟淮水陡漲自應預防存鹽既有二十萬包之多隨時設法保衛等因當經委員在西壩票鹽公所傳集湖票各販及督同棧戶秉公妥議前來伏查湖販出湖船隻向由同幫及棧戶薦保並無船行楊知事等

傳集湖票各販督同棧戶所議鹽船自壩赴關擬酌減  
裝載水腳每包以一錢二分爲率裝鹽時先付六成中  
途付一成到關再付一成其餘二成俟全船之鹽售竣  
再行找付並自到關繳釐之日起扣足六十天後按日  
加給住日錢文每日每包給錢一文按五日一付不得  
預支借用大船每天約可得住日錢千文中船五六百  
文小船亦可得錢三百文如此分別釐定鹽船在關守  
輪食用可敷似於盜賣鹽斤一事堪以補救至不肖船  
戶有心虧累湖販仍難保其必無應由該販等慎自選  
擇不宜濫雇以保血本如遇有盜賣之案惟有盡法嚴

懲以儆刁風仍於圓載時由湖販取具船戶不致盜賣切結交棧戶呈送備案經鹽政左宗棠批所議尙屬妥洽仰卽出示曉諭遵辦

謹按以上自場運壩由壩出湖各事宜以下皆五河正陽兩卡新章



兩淮鹽法志卷八十五